



JAMHURI YA MUUNGANO WA TANZANIA

BUNGE LA TANZANIA

**AZIMIO LA BUNGE KUMPONGEZA MHESHIMIWA DKT. JOHN
POMBE JOSEPH MAGUFULI, RAIS WA JAMHURI YA MUUNGANO
WA TANZANIA, KWA HATUA ANAZOCHUKUA KUKABILIANA NA
UPOTEVU WA MAPATO YA SERIKALI KATIKA SEKTA
YA MADINI NCHINI**

*(Chini ya Kanuni ya 54 ya Kanuni za Kudumu za Bunge,
Toleo la Januari, 2016)*

14 JUNI, 2017

**AZIMIO LA BUNGE KUMPONGEZA MHESHIMIWA DKT. JOHN
POMBE JOSEPH MAGUFULI, RAIS WA JAMHURI YA MUUNGANO
WA TANZANIA, KWA HATUA ANAZOCHUKUA KUKABILIANA NA
UPOTEVU WA MAPATO YA SERIKALI KATIKA
SEKTA YA MADINI NCHINI**

*(Chini ya Kanuni ya 54 ya Kanuni za Kudumu za Bunge,
Toleo la Januari, 2016)*

Mheshimiwa Spika, kwa nyakati tofauti Waheshimiwa Wabunge, wananchi na asasi mbalimbali za kiraia kutoka katika maeneo tofauti nchini, wamekuwa wakilalamika na kuonesha kutoridhishwa kwao na mchango wa Sekta ya Madini katika maendeleo ya Taifa na usimamizi wa Serikali katika Sekta hiyo. Aidha, yapo malalamiko kuwa Taifa letu halinufaiki ipasavyo na Sekta hii kwa sababu Mikataba iliyopo haitoi fursa kwa Serikali kupata gawio la kutosha, kupata kodi na mapato mengine mbalimbali yanayotokana na shughuli za uchimbaji wa madini zinazofanywa na Makampuni yaliyopo nchini.

Mheshimiwa Spika, tangu Serikali ya Awamu ya Tano inayoongozwa na Mheshimiwa Dkt. John Pombe Joseph Magufuli ilipoingia madarakani, hatua mbalimbali zimechukuliwa kwa lengo la kuongeza mapato ya Serikali na kuziba mianya ya upotevu wa mapato.

Mheshimiwa Spika, kwa upande wa Sekta ya Madini, hivi karibuni Mheshimiwa Rais aliunda Kamati mbili zilizofanya uchunguzi kuhusu usafirishaji wa maknikia ambapo, Kamati ya Prof. Abdulkarim Hamisi Mruma ilichunguza kiwango na aina ya madini yaliyomo kwenye maknikia yanayosafirishwa nje ya nchi na Kamati ya Prof. Nehemiah Eliakim Osoro ilifanya tathmini ya hasara ama faida iliyopatikana kwa kipindi chote tangu usafirishaji wa maknikia ulipoanza mwaka 1998 pamoja na kushauri hatua zinazoweza kuchukuliwa.

Mheshimiwa Spika, Tarehe 24 Mei, 2017, Mheshimiwa Rais alipokea Taarifa ya Kamati ya Prof. Abdulkarim Hamisi Mruma na Mapendekezo yake yote na kuchukua hatua za kuwajibisha wale wote waliohusika kwa namna moja au nyingine na dosari zilizobainika. Aidha, tarehe 12 Juni, 2017, Mheshimiwa Rais alipokea Taarifa ya Kamati ya Prof. Nehemiah

Eliakim Osoro na kuzielekeza Taasisi zote zinazohusika, kila moja kwa nafasi yake, kuyafanyia kazi Mapendekezo ya Kamati.

Mheshimiwa Spika, tunatambua uzalendo aliouonesha Rais wa Jamhuri ya Muungano wa Tanzania, Mheshimiwa Dkt. John Pombe Joseph Magufuli, juhudhi na uthubutu wake katika kuchukua hatua madhubuti ili kuhakikisha kwamba, Watanzania na Taifa kwa ujumla wananaufaika ipasavyo na rasilimali za madini ambazo zinaweza kutoa mchango katika: uanzishaji wa viwanda, ustawi na maendeleo ya jamii, huduma za jamii, miundombinu na hali bora ya maisha kwa wananchi. Jambo hili lilikuwa ndio ndoto ya Baba wa Taifa, Mwalimu Julius Kambarage Nyerere, ambaye kwa miaka mingi alikuwa anatamani Tanzania inufaika na rasilimali za madini ziliyopo nchini. Hivyo, naomba kutumia fursa hii kuliomba Bunge hili Tukufu ambalo ni chombo cha uwakilishi wa wananchi, kuridhia Azimio la Kumpongeza Mheshimiwa Rais kama ifuatavyo:-



**AZIMIO LA BUNGE LA KUMPONGEZA MHESHIMIWA DKT.
JOHN POMBE JOSEPH MAGUFULI, RAIS WA JAMHURI YA
MUUNGANO WA TANZANIA, KWA HATUA ANAZOCHUKUA
KUKABILIANA NA UPOTEVU WA MAPATO YA SERIKALI
KATIKA SEKTA YA MADINI NCHINI**

*(Chini ya Kanuni ya 54 ya Kanuni za Kudumu za Bunge,
Toleo la Januari, 2016)*

KWA KUWA, kwa nyakati tofauti, Waheshimiwa Wabunge, wananchi na asasi mbalimbali za kiraia kutoka katika maeneo tofauti nchini, wamekuwa wakilalamika na kuonesha kutoridhishwa kwao na mchango wa Sekta ya Madini katika kuliletea Taifa maendeleo;

NA KWA KUWA, kumekuwepo na malalamiko kuwa Taifa halinufaiki ipasavyo na Sekta ya Madini kutokana na Mikataba ya Madini iliyopo kushindwa kutoa fursa kwa Serikali kupata gawio la kutosha, kupata kodi na mapato mengine mbalimbali yanayotokana na shughuli za uchimbaji wa Madini zinazofanywa na Makampuni mbalimbali nchini;

NA KWA KUWA, Mheshimiwa Dkt. John Pombe Joseph Magufuli, Rais wa Jamhuri ya Muungano wa Tanzania, ameonesha juhudhi, uthubutu na uzalendo wa hali ya juu kwa kufungua njia itakayowezesha Taifa na wananchi wote kwa ujumla kunufaika ipasavyo na rasilimali za nchi;

NA KWA KUWA, Wabunge na Watanzania wote ni mashahidi wa matokeo ya uchunguzi wa Kamati ya Prof. Abdulkarim Hamisi Mruma na Kamati ya Prof. Nehemiah Eliakim Osoro zilizoundwa na Mheshimiwa Rais na kutoa Taarifa kwake tarehe 24 Mei, 2017 na tarehe 12 Juni, 2017, ambapo Mheshimiwa Rais alikubali Mapendekezo ya Kamati zote mbili, kisha akachukua hatua za kuwawayibisha wote

waliohusika kwa namna moja au nyingine na dosari zilizobainishwa na Kamati ya Prof. Mruma na kwa upande wa Kamati ya Prof. Osoro akazielekeza taasisi za Serikali zinazohusika zichukue hatua;

KWA HIYO BASI, Bunge hili katika Mkutano wake wa Saba, Kikao cha Arobaini na Saba, tarehe 14 Juni, 2017, linaazimia kwa kauli moja:

- (i) Kumpongeza Mheshimiwa Dkt. John Pombe Joseph Magufuli, Rais wa Jamhuri ya Muungano wa Tanzania kwa juhudi, uthubutu na uzalendo wa hali ya juu wa kufungua njia itakayowezesha Taifa na wananchi kwa ujumla kufaidika ipasavyo na rasilimali za nchi;
- (ii) Kumhakikishia Mheshimiwa Rais kwamba, Bunge hili la Kumi na Moja linaloongozwa na Mbunge wa Kongwa, Mhe. Job Yustino Ndugai liko pamoja naye na lipo tayari kutoa ushirikiano wa dhati kwa kadri itakavyohitajika katika kuhakikisha kwamba juhudi, uthubutu na uzalendo aliouonesha haupotei bure bali unakuwa chachu ya kuhakikisha kuwa Sekta ya Madini inachangia katika kuleta Maendeleo kwa Wananchi na Taifa kwa ujumla; na
- (iii) Kushauri kwamba, hatua kali zichukuliwe kwa mujibu wa Sheria, Kanuni na Taratibu kwa wote ambao kwa namna moja au nyingine watathibitika kuwa wamehusika katika kuliingizia Taifa hasara na kuwakosesha Watanzania fursa ya kufaidika na rasilimali za madini.

Mheshimiwa Spika, Naomba kutoa Hoja.

Capt. (Mst.) George Huruma Mkuchika,
MBUNGE WA NEWALA MJINI

14 Juni, 2017